

Alles nor Routine

Om letzde Sunndaach beim Friehschoppe wollde merr uns ferr e Fahrradtour verabredde, de Schorsch, de Karl unn ich, unn ich sach: Wie wärs mettem nächsde Mittwoch, habbder doo was vor?

De Karl hott aus soine Briefdasch enn Kalenner gezooche unn hott druffgeguckt: Om Mittwoch? Uns dets basse, mir hawwe die gonz nächst Woch frei - unn dess iss doch widder mol e gut Idee. Mir nemme was ze esse unn ze drinke mett unn mache e gemiedlich Picknick uff de Wisse im Flerscher Wald, was haldern defoo?

O ja, habb ich gesacht, dess mache merr, dess werd schee

Nor de Schorsch hott gemoont, er missd dehoom erst mettem Kättche schwätze, weil sie hätte so vill Termine, die kennsde derr joo all nimmi im Kopp behalle, awwer mittwochs middaachs hätte joo die Dokdern zu unn doo missds eichtlich basse.

Doo sach ich: Ei ruf uns heit middaach oo, wens klappt. Unser Mädcher misse joo doodeferr noch ebbes vorbereide unn ich sorch ferr de Ebbelwoi unn ferrs Wasser.

Doo nickt de Schorsch: Ich ruf nit oo, ich schick e Messitsch.

Ich habb gegrinst: E Messitsch ... nor, Schorsch, dem Karl konnsde koo Messitsch schicke, der hott koo Händy.

Doo guckt de Schorsch de Karl oo: Hosde immer noch koons, Karl? - ich sach derr, e Händy muss merr hawwe, unn er zieht soi Händy aussem Säckel, zeichts em Karl unn sacht: Aach dess Bediene iss gar nit schwer, dess hosde im Nu eraus. Unn so deier iss dess aach nit, weil ...

Grad in dem Aacheblick hott em Schorsch soi Händy zimlich laut de Radetzkimarsch gespillt.

Schorsch, Telefon, hawwe merr gerufe, awwer de Schorsch hott nor Pst! gemacht. Dann hotter gesacht: Oomol hotts geklingelt, gell?, hott e Stick Babier aus soine Hemdedasch gezooche, hott druffgeguckt unn hotts widder oigesteckt.

Doo hawwe mir zwaa e dumm Gesicht gemacht unn ich habben gefroocht: Was war denn dess?

Ja, ihr Männer, telefoniern ohne Geld, dess iss die Kunst. Weil oomol klingelee heißt: Vergess nit, wasde derr uff doim Zettel uffgeschriwwe hosd. Zwaamol klingelee heißt: Es werd Zeit dassde hoom kimmst, unn dreimal klingelee heißt ...

Doo musst ich werklich lache: Schorsch, waaßde on was mich dess erinnert? On de Karl May! Bei dem hawwe die Indianer aach so Zeiche gewwe. Oo Raachwolk hott gehaaße: Vergess nit, was de uff die Birkerind geschriwwe hosd, zwaa Raachwolke hott gehaaße: Mach dassde dich in de Wigwam schleichst - unn wens nit uff geheert hott se raache ... wars Büffelsteek ogebrennt!

Doo hott de Karl so lache misse, dass er sich verschluckt hott, unn während ich em noch uff de Buckel gekloppt habb, iss de Schorsch uffgestonne: Meine Herren, Sie verstehen nichts von moderner Telekommunikationsroutine und vor allem nichts von der dort möglichen Null-Euro-Variante. Es tut mir leid, aber mit Ihnen unterhalte ich mich nicht mehr. Fräulein, bitte zahlen!
Unn fort warer.

Eiern Honnes